

今在山房詩詞選


八十二歲年授勅



PL  
2733  
.A53







Digitized by the Internet Archive  
in 2010 with funding from  
York University Libraries



YORK UNIVERSITY

JUL 03 2001

EAST ASIAN STUDIES

雪在山房撰文詩詞選

八十六歲辛授弘







生平作詩不下三千首雲在山房類稿所刻止三百餘  
首雖經淘汰仍多瓦石深悔災梨爰乞樊樊山丈及楊  
昀谷汪仲虎夏枝巢趙幼梅諸君評選僅存百首視前  
刻止三之一念師友淵源之雅別寫一本藏之匱中外  
此俱不足存付之覆瓿燒薪可也

文十首丁闇公顧壽人所評定今兩君已作古余再就  
原文改定別寫一本存諸匱中每一展誦爲之惘然

苓泉居士自記



雲在山房類稿十四種初印僅三百部贈售卽完旋值  
兵事工料奇昂不能添印而索者紛紛家嚴乃取匱  
中所度駢文選十三首詩選百首詞選十九首命景燧  
等排印以備贈送全稿卷頁繁多應俟續印

景燧景燧景燧謹記



雲在山房類稿總目

唐文治序

孫雄序

周學熙序

思冲齋文鈔

趙芾序

顧恩瀚跋

思冲齋文補鈔

思冲齋文別鈔

錢基博序

思冲齋駢體文鈔

丁闇公序

思冲齋駢體文補鈔

思冲齋詩鈔

樊增祥序

錢海岳序

宗威序

思冲齋詩補鈔

鉢社偶存

鴛摩館詞鈔

汪曾武序

郭則澐序

鴛摩館詞補鈔

藏盒幸草

楊鍾鈺序

雲藹詩話

雲蘊漫錄

覺花寮雜記

徐沅序

貫華叢錄

趙楷年序

以上原刻十五種

秋草齋詩鈔

秋草唱和集

夏仁虎序

雲蘊書札

苓泉居士自編年譜

趨庭隅錄

許國鳳序

以上續刻五種



壺中九老圖詩序

裨瀛之交輿嶠之列有方壺焉仙靈之所宅也裴島微茫海日現鳳麟之

采丹樓縹緲天風送鸞鶴之聲嘗讀道籙仙經所載洞天福地大都在海

山深處煙雲杳靄之間疑塵世無此境也不知物得天而獨壽人與地而

同靈山水之性契金石而愈貞煙霞之姿入丹青而彌古自昔弘景華陽

之館摩詰輞川之莊英光寶晉之齋清秘雲林之閣過其廬者望若神仙

何必餐芝餌朮始享長年飲谷棲巖方稱大隱也哉方壺齋者在燕都城

西宣武坊之南蔭北兄所居也西隣槐樹斜街東毗藤花老屋

朱竹垞所居

徑

開調鶴堂構戲鴻行吟當紅藥之階入直近紫薇之省鈿閣綺窗一院之

樹陰盡碧笛廊琴榭四時之花氣皆香兄於休沐之間輒有讌游之樂况

復性顓嗜古家富藏珍入謨觴之室香溢縹緲披寶鑑之圖輝凝彝鼎論

者每比之江村之精識退谷之洽聞焉壽栢自辛卯至甲辰每蒞都門恆

居書館而吾族章甫叔祖筱荔幼梅心裁經筵諸叔石漁仁山兩兄或從

公粉署或謁選金門時駐軒駢共聯觴咏舊德溯靖恭之宅清規傳莪讓  
之門謝家山墅不賭香囊李氏門庭共稱花萼早朝初罷爐香猶染金貂

內宴方闌蠟淚輒成珠鳳

王氏子弟內宴僧虔以蠟珠綴成鳳風

亦可見門風之敦睦世運

之承平矣朝市已改坊巷未更白香山致仕仍寓東都管幼安避兵尙居

北海故宅空留文藻閉關屢閱滄桑今歲壬申七月爲兄七十壽辰於是

筱荔叔年八十一石漁兄年七十九皆於明歲重宴鹿鳴仁山兄年七十

七幼梅叔年七十五心裁叔年七十一經笙叔年六十七章甫叔祖年六

十四壽枏年亦六十五矣夫吉胡盧鄭非出宗親卷稷充融未登耆壽敲

訐同志蒼涼東澗之居點屑齊名惻愴西山之別今也三世入夢華之錄

一門希綺皓之風方諸古人亦爲難得然處羈旅者每思故里瓜挑之戚

際遲暮者彌念少時梨棗之歡是以看雲悲夔府之秋話雨憶彭城之夜

鴻留爪印燕認巢痕爰借縑素流傳付雲仍保守廬仍修竹齋卽况梅

皆先

代書齋名

水石寫其襟靈雲松摹其標格或捲簾讀畫或凭几看棋或臨池裁



蕉葉之箋或據石奏梅花之弄有書有酒但供風月之談不帶不簪都具  
山林之氣抱琴之僮亦生鶴髮挂屨之樹已作龍鱗回憶春草池塘夕陽  
門巷佳節茱萸之會芳園桃李之游輒爲之撫卷流連感盛時之不再也  
圖成名曰壺中九老各系以詩命壽相序之昔吾鄉秦氏有寄暢九老同  
郡莊氏有南華九老彼皆遭遇昌時優游晚歲擅門第衣冠之盛享園林  
鐘鼓之娛今者烽火各天江湖滿地黃塵海上共看桑田白髮山中重吟  
桂樹渺渺搏沙之感蕭蕭落葉之愁追念生平能無悵觸然而守儒素之  
業惟愛青氈傳清白之箴不矜丹轂南祖北祖同席慶餘東廳西廳能談  
掌故過舊時之池館尙有竹林訪前度之園林依然花樹則是圖也可  
擬李伯時山莊畫卷入陸放翁家世舊聞矣壽相仰附清芬幸陪嘉會敬  
綴蕪翰以侑華觴勝事圖碧山之社人是一家良辰賦赤壁之游期先十  
日至亭館人物之位置均詳後荔叔記中故不敘

顧曰麗藻清文似卷苑閣南華九老詩序而典實勝之集  
中駢文篇篇俱佳勉循尊命評選十首尤精金玉也

錫山楊氏壺中九老曰前浙江候補道寧波府知府志濂年八十一  
曰前湖北候補知府年七十九均於明歲重譙鹿鳴曰前廣西柳  
州府知府道霖年七十一曰前軍機處領班郎中春顯年七十五曰前法  
部主事恩儒年七十一曰前郵傳部郎中三品章京署光祿寺少卿  
內閣制誥局局長壽樞年七十曰前浙江候補知府建綸年六十七  
曰前度支部左參議長蘆鹽運使壽椿年六十五曰前安徽候補直  
隸州州判鍾鉦年六十四九人者皆以科名仕宦起家有政事文章  
之美退休林下俱享耆年亦清門之人瑞也既繪爲圖爰爲疏其官  
職名氏於後庶來者有  
所考焉武進趙椿年記

蔭北兄曰乾隆朝西城商市最盛方壺齋爲梨園舊名嘉道間改爲  
京曹住宅僅十數家名仍其舊余居此四十年矣辛亥後杜門不出  
壬申七月余年七十族中耆宿繪此圖以贈筱蓀叔作記  
味雲弟作序此圖傳諸雲仍足爲吾宗嘉話子孫寶之

### 林子有閩詞徵序

同社林君子有選閩詞徵旣成屬余爲序且曰君鄉丁氏聽秋館詞話於  
吾閩多徵詞願得君一言以解嘲余辭不獲命乃援筆而序曰八閩夙稱  
才藪兩宋尤擅詞名自冬郎南去傳豔筆於香奩耆卿北來播新聲於檀  
板後此名章玉映才宿珠聯早已主上國之敦槃抗中原之旗鼓乃吾鄉  
丁杏舫先生則謂其音淆瑣掃韻雜戈靴擁鼻作謝安石之吟張喉效李



伯時之戲

丁氏謂閩多鼻音

一若荔枝之曲祇數粵中梅子之名獨推吳下偶然

評伯遽爾流傳無怪竟陵諸子望紅豆莊而生嗔復社多才觀綠牡丹而  
變色余以爲土風皆能作操俚語本可入詞音多鳩舌而騷人以南國爲  
宗謔到鷄頭而詩派以西江爲盛今顧獨議閩詞者良由南宋之季閩學  
方昌近思錄人手一編通志略曰鈔數卷延平危坐豈題紅刻翠之時夾  
際著書無鏤月裁雲之暇倚聲視爲小道顧曲遂少專家沿及有明彌形  
寥落彼其時少谷稱詩石倉好客紅雲社裏金粟臺前豈無側帽才人工  
題花葉剪綃韻女解唱竹枝願或畏鐵秀之呵退聽堂自刪少作或避桃  
村之謗斷腸集不落人間幾令蘭畹無香榕陰不韻葉小庚詞鈔所錄不  
少遺珠謝枚如詞話所收無非碎錦芙蓉鏐不投良冶何由知切玉之奇  
苧蘿村自晦明妝誰復識傾城之豔近代詞流踵系雅道日尊勳名如雲  
左則范希文之黃葉碧雲忠愛若葭庵則蘇子瞻之瓊樓玉宇聚紅製譜  
飛翠傳箋

聚紅爲咸同間閩中詞社子有家有書齋名飛翠軒

三山之花草俱妍九曲之煙霞更勝

儻無人亟為蒐輯恐此後又復銷沉今予有具石帚之清才仿草窗之妙  
選廣徵鄉獻博考方聞網羅越入百年著錄逾一千首是選出而知鳳洋

山下人握金荃螺女江邊家藏玉楮蕉雨軒寫成定本合歸勤有雕鏤

初國

閩本皆余氏  
勸有堂刻荔香社唱徹清聲足助宛鄰鼓吹鈔來半夜我將賄侍史貂

裘傳到中州誰復笑參軍蠻語僕未諳宮徵敢下品題但念李伯紀解官

流寓晚年遂號梁溪

李忠定世居無錫籍仍邵武

浦長源入社論詩同調實宗左海東

林俎豆林德衡栗主如新

舊令林宰漳浦人祀東林

南嶠旌麾孫平叔

孫文靖

棠陰猶

縟吾錫與閩淵源不淺偶形牴牾宜事溝通不敢為左袒右袒之分聊自

附繫鈴解鈴之義又結一重香火來草堂入夢之古靈

秀野草堂選元詩成夢古衣冠多人

下試烹第二名泉品井水歌詞之雋味

丁曰君自謂此文變格學鄙體下走自問萬萬不逮君文如秋水芙蓉不假雕飾此篇雖稍變格然隸事選詞麗而有則非若鄙文之蹠

也

顧曰此題頗不易著筆既須揆張閩詞又須迴護鄉先輩文特提出閩學得尊題法難題自迎刃而解矣至筆力之雅健詞華之典瞻猶



其餘  
事

嚴堯欽駢體文序

乙卯丙辰間余主計山左嚴子堯欽來參幕事觀其文采道麗詞翰精妍判牘則趣博而事昭箋記則慮周而藻密時復明湖選勝官閣聯吟翠簾畫舫掀笛藕花之鄉銀燭清尊題襟海棠之社

署中有宋海棠二花時觸詠其下

湖山助

其文藻仕宦擬諸神仙既而余上計北行君亦投簪南返仲長樂志惟在田園幼輿清標最宜巖壑衡門嘯咏述作斐然沈隱侯之賦寫以屏風柳文暢之詩圖之團扇其所精詣尤在駢文夫尊秦漢者卑齊梁爲綺靡師韓柳者薄徐庾爲淫哇不知文章之道文質相輔奇偶相生秦碑之古奧瑰奇漢賦之淵懿醇厚古文之矩矱亦卽駢體之權輿東西京先導其流南北朝盛行此體爲之工者必沈酣典籍杼軸性靈緯之以精思澤之以古藻格雖排偶氣實單行子山之沈鬱蒼涼得龍門之神理孝穆之華縟整鍊具蘭臺之體裁退之金石之文都京頡其瓌麗子厚山水之記騷辨

漱其芳華軌轍雖殊淵源則一乃今世作者以堆塚爲富以塗抹爲工體則錯采鏤金字則儷青妃白萬花錦繡織成雖費工夫而七寶樓臺拆下不成片段又或搜兔園之僻典撫虬戶之奇辭符號詮癡簿稱點鬼譬諸商彝周鼎藏珍皆稗販而來晉帖唐碑贗本自鉤摹而出讀者驚其博奧識者病其艱深堯欽則力謝穠華自成馨豔姑射神人具綽約之態甄陀歌曲發微妙之音其氣格如白雲孤飛奇花獨笑在畫家爲逸品在琴曲爲商音邵荀慈所謂於綺藻豐縟之中存簡質清剛之製覽君所作何媿斯言僕技類雕蟲見同測蠡延才人於賓館屈名士爲衙官每當刻燭分箋停觴授簡一篇脫手便付傳鈔一語會心互相欣賞綢繆風義謬許知音爰就管窺聊資嚶引抱烟霞之逸趣君疑藕蕩後身嚴秋水自號藕蕩漁人寫風月之清詞我媿蓉裳嗣響

丁曰淵雅似汪容甫秀豔似劉芙初下走前爲尊文作序自謂恆心今誦此文乃不中作僕他日拙文付印得君一序無憾矣

顧曰論駢散文源流體製深識洞微足徵精詣力謝穠華自成馨豔可以移評此文僕不必贊一詞矣



姚柳屏扶桑百八吟序

扶桑百八吟者故友姚子柳屏之所作也君以騷雅之才任轡軒之役龍節虎節麟洲鳳洲入松島而訪藏經過芝區而考學制繙吾妻鏡之故籍證朝日丸之異名鷄林賈舶爭購新詩龍沙行篋尙留舊記於是采其謠俗譜以謳吟隸事皆新擇言尤雅考山川志風俗紀游同赤雅之篇蒐佚事摭異聞載筆仿黃車之錄詢職方之外史而樂府之新聲也乙巳之冬與君同使東瀛雪夜圍爐出示此編命爲弁語人事蹉跎晷序颺忽何圖一諾遽隔千秋青楓關塞何處招魂白髮江湖淒然感舊乃與汪子衮父陸子彤士共取是編爲之校印雖蟬留遺蛻蟬賸殘灰抑亦安石之碎金文通之斷錦也猶憶明湖折柳杜曲看花烟波畫舫如蕩古愁風雪旗亭共賭妍唱至若泛滄溟之檝采靚譯之書吐納雲濤摩弄星漢胸中小五嶽足底大九州意氣之豪不可一世尺波遽謝樽酒已寒秦淮桃葉之曲先帶離聲

君姬人先  
半月逝

巴渝竹枝之詞遂成絕唱覽斯編也殆不勝金刀掩

芒玉筍埋雲之感焉一燈黯淡客思如潮萬葉蕭騷秋聲欲雨校錄既竟爲之累唏

丁曰士衡歎逝之賦子山思舊之銘  
顧曰歌離弔逝音韻如涼秋雁唳清夜猿啼

### 竹素園叢談序

顧子涵若目眩萬態腸脘百憂抱觚而處握槩而游一日出其所著竹素園叢談而告余曰攘攘六合芸芸衆生嗜欲殫然不給則爭吾蟲其間方猶蝘腹之蟹與蚊睫之螟彼夫朱邱沉沉車如游龍貂烏錯坐蛾睺環列呼吸生風雲咳吐成雨露曳裾之士願乞猪肝奉觴之賓冀分鵝炙此權勢之赫也吾蹇於命不敢與爭削脯擊鐘賣漿列鼎阡陌鱗錯棟宇翬飛陋吳鄧之銅山傲卓鄭之丹穴五花之廐錦作連錢七寶之牀珠施步障此貨殖之雄也吾拙於術不敢與爭至若發藻文林探源學海龍門著史虎觀說經藏諸名山以餉來哲又或旨兼騷雅趣託幽玄揚雲奇字慮覆醬瓿王維苦吟誤入醋甕此學士之覃思才人之慧業也吾惰於學嗇於



才亦不敢與爭吾少齒於庠青衿而獲落壯筮爲吏黃綬而陸沉頽齡難  
制百年颺馳積感不消五嶽稜起固宙合之悴民也然猶且掇拾唾餘摅  
撫耳食覩記所及媵以楮毫藉此消汨心神收召精魄此卽吾砭憂之具  
藥憤之方也予幸爲我刪削而排比之余受而卒業其書隨筆纂錄不主  
一格蒐討國故則朝野僉載之流也誦述先芬則家世舊聞之例也敍兵  
戈浩刼似泣斬錄之蒼涼誌神鬼異聞非諾皋記之荒幻以及甕臚閒評  
曝簷瑣語考證名物品藻詩文詞必歸於雅馴體不傷於躋駁亦足見君  
記覽之賅洽學養之深純矣嗟嗟數十暑寒吾輩已老萬千著述幾人可  
傳校書芸閣讀者每苦其浩繁秉筆蘭臺作者或多所忌諱反不若野乘  
流傳之易私家記載之真採其逸事可供捫蝨之談擷其珍聞足抵揮犀  
之錄也余略爲點定俾付鈔胥乃書甫成而君病病十日而君逝矣嗚呼  
傷哉尺波瞋眇寸臆蒼涼搏搏之地鐫石而長埋余爲君作墓銘穹穹者天呵壁  
而難問孤蛩絮夕如訴牢愁征鴻叫涼若覓儔侶感時蕭屑觸緒悲哀爰

述遺言弁諸簡首

丁曰作者文胎息六朝故華豔而不嫌  
氣滯典瞻而不覺堆砌由其情韻勝也

蘇曰風骨清剛情韻深遠看似華瞻而實雅  
潔看似平易而實洗鍊此等工夫殊不易到

陳葆生詩序

碧雲紅葉三秋賦別之時烏帽黃衫千里從軍之客吾友陳子葆生辭倫  
好戒徒御歷龍門之鎮訪虎牢之墟軍門長揖傳脩期下馬飛書幕府高  
吟劉越石聞雞起舞此行也丁流離之世直搖落之辰不無伊鬱之思宜  
有牢愁之作然而關河重阻地當四戰之場川陸交衝人具五方之俗金  
梁橋上月色秋寒銅瓦廂邊河聲夜壯君也過夷門而尋任俠登廣武而  
弔英雄交游皆湖海之豪文字得江山之助又復旗亭賭酒曲院徵歌攜  
紅袖而題箏擁紫裘而擲笛珠簾十里蕩如春雲銀燈萬枝映以華月

以上

皆詩中  
本事

亦足以消磨積感陶寫閑情矣游覽所經篇什遂積閱時五月得  
詩若干首題曰獨學廬詩梁苑集屬余為序余惟君述德自祖賜書在家



一門龍虎之文四世鵷鸞之序

其年之弟宗岳爲侯朝宗塔子孫入歸德籍四代翰林

清聲華望藉

甚南州君以儒俠之才負賢能之譽豪氣如茅孝若房中之么鳳成羣風  
稜似李琳枝杖下之靈經不赦固宜發舒壯采紹述先芬而乃書劍蕭條  
干戈漂泊話舊事三吾亭畔碧凋桐樹之圖過外家四憶堂前紅褪桃花  
之扇傭書筆禿乞米甌空黃麈屈作尉之才蒼鶻類參軍之戲此則賦成  
鸚鵡自悔才華唱到鷓鴣倍增悽怨者矣嗟嗟歲月之流連於轉蓬交游  
之散紛若隕籜依依柳雪人生多行役之勞采采葭霜天末起懷人之感  
鶴餘倦羽鴻入歸心家山秋老待從君雪苑之遊人海風高盍尋我月泉  
之社

丁曰此文脩新富豔又似迎陵而無其俗調葆  
生爲其年檢討之後故君文亦變格學迎陵

顧曰嶽明遠之芳  
馨擷蘭成之秀藻

馮申甫蘭陵返棹圖序

吾郡南襟笠澤北枕大江山川秀靈鍾爲都會十里鶯花之海五湖蝦菜

之鄉文窗鈿閣面面看山畫舫珠簾家家臨水民間則事耕桑饒林園采  
菱之塘帶以蟹舍種橘之洲繚以魚陂風土號爲清嘉丹青圖其名勝僕  
與申甫結廬其間川原相望百里而近雲谿之沚荃湖之湄留笠屐之舊  
圖指釣游之故跡中歲以還勞形簿領黃塵抗乎烏帽白社掩其清觴尊  
鱸之思渺然天末戊戌冬日僕權晉臬申甫亦出守太原舊雨重來客星  
暫聚訪家山之近事話鄉社之舊聞爰以蘭陵返棹圖出示柳絲斜照之  
天菰葉橫塘之路煙黛數笏蘿峰翠腴風漪一奩桃浪紅膩滄江夜靜虹  
月米家之船藍田秋老水竹右丞之墅託諸縑素寄爾遠思亦猶竹垞翁  
之煙雨歸耕石谷子之溪山逸趣也或謂桃源作記本彭澤之寓言桂樹  
名篇亦淮南之託興君以蘭臺之彥出守名都一縑表其清郎五袴歌其  
循吏璽書褒寵專城早樹威風繡斧森嚴列郡咸欽丰采官職與聲名並  
美文章共政事兼長豈能遽脫朝簪徑還初服斯圖之作亮非本懷不知  
君少歷憂患中更亂離從宦六詔之鄉避兵五溪之洞枕榔月暗瘴霧壓



裝鵜鴒風高埃火團壘摩箒棧而聽虎渡藤溪而墜鳶旣乃適楚依劉浮  
湘弔屈芙蓉薦水仙之廟薜荔結山鬼之隣仲宣作賦不堪客子憂生賈  
傅投書同是少年多恨雖復早登華仕洊歷清階而泥金甫報荆枝已摧  
符竹初分萱草忽萎因軫謝公哀樂之感頗識向生損益之旨所以寄跡  
塵中抗情霞外未題丙舍之帖先仿午橋之圖季真投老惟尋鏡曲之煙  
波希文守邊猶戀圭塘之風月也僕一官匏繫千里萍浮風塵役其夢魂  
泉石寄諸形想流連尺幅帳觸遙襟他日者歸臥煙江卜居雲壑課耕綠  
野結社碧山相與釣菱溪之魚攜琴臺之鶴讀書倪迂之閣品泉陸羽之  
亭展斯圖也庶幾隨志和而泛宅附元禮而同舟乎鴻雪留印鷗波訂盟  
青山白雲共鑒斯約

丁曰神味淵永似孫淵如風格超雋似洪北江詞華豐豔又似君家  
蓉裳常州人作此題自應仿常州派然秀韻天成仍是作者本色

顧曰綺思妍詞是謝康樂初  
日芙蓉非顏光祿鑲金錯采

貫華香火記

翠壁嶙峋丹邱窈窕中有高閣是曰貫華蓋顧梁汾成容若去梯玩月處也其地則虎溪鶴磯其人則石帚玉田逸想凌霞清談霏雪蘿月窺幕燭

花不紅松風入簾茶煙自碧投壺側帽主客成圖

梁汾寫側帽投壺圖容若題詞

以一夕

之清游爲千秋之韻事雖復華年水逝勝蹟灰飛而紅牙按玉茗之詞彩

筆寫金荃之句從刼雨闌風之後證冰牀雪被之禪

二語用楊伯夔詩句

同人所以

寄荃宰之思而發檀施之願也今者紺榭一新丹臺重麗輞川之游得裴

王而著松陵之集因皮陸而傳惟彼兩賢允宜尸祝蓮葉雙座分占梵王

之宮梅花一龕合作詞仙之宅伴以青松翠竹薦之碧杜紅蘅至若騷人

韻士憑弔流連或借讀精廬或留題素壁或採撫軼事或纂輯舊聞既留

翰墨之因緣合受煙霞之供養諏諸衆論僉以爲宜閣旣成乃於第三層

設兩龕上龕祀梁汾容若兩居士下龕祔祀鄉先生若干人俾山僧司其

香火名山無恙詞客有靈庶幾雲中仙馭同笙鶴以翔游月下神弦共鐘

魚而響答



丁曰蘭薰玉色醴味琴聲  
顧曰華鍊腴秀筆下無一點俗綺

### 丁沽秋泛記

七十二沽諸水渟匯蘆碕深淺鳬雁是栖葦塘縱橫蠺蛤所產一泓杯瀉  
十里鏡平過者渺然有江湖之思焉丙寅七月溽暑未闌冰泉不寒火雲  
猶赤陸子彤士至自都門淪荷露以論詩披松風而讀畫古歡旣洽清興  
忽生乃擘吟箋召游侶爰自西郭泛於南窪天鼉川瑩俯仰一碧榜仄妨  
膝橋低礙眉時則紅藕將殘白蘋未老柳絲冉冉猶帶斜暉荻花瑟瑟已  
含涼吹煙波一曲便擬鏡湖之居水竹三分言訪斜川之墅過管洛生別墅叩舷  
嘯咏清風自生照影而游魚驚聞聲而宿鳥訝以視南浦采綠西湖鬧紅  
誠歡戚之殊悰喧寂之異致矣俄而彤霞散綺素月流輝蟬咽露而無聲  
鷺偃煙而有影沿流回棹問渡移舟玉驄陌上何處停驂銀燈水邊有人  
按曲皆是夕起暮愁於雁外留秋夢於鷗邊謂宜寫景丹青留題煙墨爰  
綴荒翰以引其端同游者太倉陸夢孚陸彤士秋浦周立之閩侯林子有

無錫楊味雲數太白竹溪之侶祇少一人仿東坡赤壁之游恰先四日

丁曰是君鄉孫洪一派而不學其勘體自然古秀淡雅  
應曰文章易作通峭難爲如此文乃足當通峭二字

祭張少軒將軍文

維癸亥秋九月某日奉新張定武上將軍以疾卒於津門嗚呼哀哉是夕

也風雲慘澹海邊沈笳吹之音星河動搖天半掩斗匡之影

史記斗戴匡  
六星一上將

悲哉氣也如金戈鐵馬之交馳靈之歸兮與紫蓋黃旗而共逝僕也感懷

慨同舟之誼念殷勤設醴之情臥病空堂驚聞噩耗睠焉舊事悽愴傷心

越七日病少間乃以清酌庶羞致奠於公曰嗚呼三辰失位四海橫流鬼

同曹社之謀人鮮殷墟之戚公獨奮回天之力矢蹈海之心利鈍不敢知

毀譽不暇計將欲御五龍以鉤虞淵之日策六鰲以奠員嶠之山運祚已

移功業未就一軍忠義盡化蟲沙九廟神靈終傷禾黍而精忠瀨氣猶將

凝爲碧血化爲白虹壯河山而貫星日以視金符寶冊爭陳勸進之文玉

帳牙旗坐擁上游之地其心事爲可同日語哉公今者驂蒼螭駕赤麟排



雲而叩九閭馭氣而凌八極河山蝸角富貴蝸毛固已等勝負於累棋視興亡如轉轂矣而僕猶且流連山陽之笛惻愴雍門之琴擊玉唾壺而悲歌持竹如意而慟哭者蓋非但庾蘭成思舊之感抑亦有劉越石傷亂之情焉嗚呼碑沈峴首劍沒豐城賓朋感慨空悲易水之衣冠父老謳思猶識順昌之旗幟英風不沫公論常留沒而猶視鬱一生忠義之忱生有自來懷千古英雄之氣嗚呼尙饗

丁曰以山邱華屋之悲兼陵谷滄桑之感俯仰身世情餘於文令讀者悽愴傷懷百端交集

顧曰易水之筑雍門之琴沉鬱蒼涼情文兼至

### 許佩丞辛盦詞序

東風巷陌薺麥方青斜日園林棠梨如雪芳時晚晚孤抱蕭寥吾友許子佩丞蹙然造門出所著辛盦詞屬余校定余與君雲津邂逅汐社論交花下酒邊每多酬唱鞭絲帽影春聯綺陌之遊蠟淚爐香秋動畫堂之思君所作詞皆緣情聲逸觸緒邈綿採其名章多疏影暗香之亞聆其妙唱亦

曉風殘月之遺往往繡上琴囊填成簫譜賞心所寄爲可無言君早飲香  
名夙秉奇氣交盡顧廚之彥才兼儒俠之長痛飲旗亭結客多黃驄年少  
高談幕府知兵同青兕才人甫聞棠舍之歌遽動黍離之感遂乃投簪海  
岸晞髮滄江鋒鏑未吐匣中之劍氣如虹塊壘難消襟上之酒痕猶碧哀  
時感遇每託倚聲於是斑管摘妍紅絃寫韻麗則少游之珠幡翠蓋豪則  
子瞻之鐵板銅琶綺密則夢窗之金碧蓬萊淒豔則碧山之蕙蘭芝菌蓋  
體賅衆美而才擅專家至若江亭咏絮山館憶梅纏綿紅藥之吟惆悵綠  
陰之感今日桃花不知何世舊時燕子又入誰家

皆詞社  
本事

銅盤之清露垂

垂玉筍之秋雲黯黯蓋於身世盛衰之際友朋離合之間尤三致意焉頃  
歲世事星移吟朋雲散逝者已同隕籜存者又類飄蓬弔耆卿於仙掌冷  
落紅牙訪子野於垂虹蕭騷白髮回憶月榭倚譚雲廊按拍柳邊擲笛花  
底捶琴相與度石帚之腔訂玉田之譜窮源流正變校宮律參差此景此  
情不可復得讀君之詞曷禁百感之交集也

此文未經丁願兩君評  
選似是可存補錄於後



丁闇公駢體文序

邢子才言文章不嫵媚正似疥駱駝祖瑩曰文章須自出機杼成一家言  
昌黎曰氣盛則言之長短聲之高下皆宜知此者可以讀闇公之文君具  
搖岳凌滄之筆裁雲鏤月之思早歲卽辨四聲弱齡已通萬卷凡四部七  
略之富五方六甲之奇鄉環室內金繩寶軸之書顯節陵中綠牒赤文之  
字覽之而目如閃電誦之而口若懸河故其發爲文也爛如赤城之霞浩  
如黃河之水其運思之精邃也如紅蠶繅繭繭綠蟻穿珠其製詞之珍麗也  
如佳饌合鯖新機織鳳如入華嚴法界香花幢節七寶莊嚴如望員嶠神  
山金碧樓臺五雲縹緲又况手摩銅狄目斷金莖孟元老飽閱夢華徐應  
秋廣搜談薈陶南村掌錄無非國史遺聞孫北海燕談都是春明舊事故  
能以沈鬱蒼涼之氣成閎博瑋麗之文並世才人殆罕其偶樊山丈與余  
書曰以吾所知獨步江左惟有丁髯耳余謂闇公之才似胡石笥以副貢  
終遇亦相類貌似陳迦陵若開鴻博科髯當超羣軼倫矣君年四十始至

京師一時老宿傾衿名公倒屣春雨杏花之句徧繡羅衣秋雲木葉之篇  
爭題紈扇耆卿樂府井泉有處能歌

君著有滄桑  
豔傳奇行世

白傳詩篇郵壁之間爭

寫使其著金鑾之記題玉署之碑孫宗右曰試百篇劉原父夕揮九制何  
足異哉乃以芸館清華之胃而名不登賢書以蘭臺著作之才而官不掛  
朝籍海內誦劉蕡之策翻令李郃登科江東知羅隱之名但爲錢鏐作奏  
閒話金臺殘劫交遊多桑海遺民遍觀石室奇書家世本蓉城舊主白鶴  
峰齋廚甫就遽催奎宿歸垣

君移家甫  
一月卽病

蒼龍溪宮觀初成須召玄卿作記

嗚呼闇公以子之才而遂止於此詎非命耶僕交比蒞蘭感均葵麥效松  
陵之皮陸擬蓮社之宗雷銀燈官舫陪花下之勝游玉笛旗亭賭酒邊之  
妍唱隱侯作賦先示王筠永叔論文輒思謝絳喁于相答惟我與君今者  
青簡猶新素徽已碎歎逝誦士衡之賦徇知定敬禮之文擅赤雁白麟之  
巨製不逢盛世咏歌覽鵬聞虬戶之奇詞須待通才箋注

闇公評余文後曰異日拙文付印得公一序足矣  
今君歿已十餘年文尙未印補錄此文以志前語



煙沽漁唱序

嘗聞潛鱗叩瑟相感以至音豐鯨應霜罔睽於異質而况岑苔共色畝蕙  
一馨跌宕煙霞綢繆瀟晦霞初星晚倚參差兮相招鐙影杯香按玲瓏兮  
如語雖復鵲愁花落鶴怨松孤傷時則清角黃昏感逝則空簾斷碧而絃  
匏之音弗輟芥珀之契彌敦光景常新茲可尙已地當左輔水繞雲津萃  
永嘉之流人多貞元之朝士清尊罕集客來則預掃煙蘿短艇任呼興至  
則同尋芳杜踵遐輶於櫟社拾幽韵於松陵緣情綺靡露花倒影之章寓  
感蒼涼煙柳斜陽之句鏤冰費日刻楮窮年按璫簫之譜幾徧九宮彈錦  
瑟之絃恰成雙調蓋會逢百集而時閱三秋焉當夫停觴選韵限漏傳牋  
紅燭短而華夜長黃金賤而芳春貴花陰濛濛明月欲墜萍影冉冉流波  
不停桃館筵疏蘭山曲永一日之樂百歲難忘又或一葦款春雙橈載夢  
樓尋豔雪寺訪孤雲風花引袂趁野蜨以羣飛煙水爲家指汀鷗如舊識  
簪雨收而襟潤藕颺下而笙清泠然步虛鏘如戛玉是可忘世因知樂天

嗟乎紅橋高譙半屬遺民青谿勝游大都流寓士當檀槐移劫禾黍驚秋  
慨露車之安歸託邱琴以自寫歲不與分心之傷矣而又朋簪代謝逝水  
如斯暮景蹉跎夕陽無限謠絃紫曲迷離京雒之塵語笛紅樓零落伊涼  
之譜瑤情未墜綺夢都非猶賴是編也追溯昔踪稍溫前緒折疏麻以寄  
思眄芳草而移情人間餘賞有摩支之散辭曲裏流年儼樓羅之小麻於  
時蒸梅雨溽拂柳風薰單衣試酒之天清簟看棋之地展痕猶是邈對荒  
落絃怨重傳淒聞哀竹對客而評白紵呼鬟而唱黃河誰借月泉之尺十  
斛平量如披水繪之圖千春宛在請爲批導聊代輦言世有賞音諒其結  
轡

此首係與蟄雲同酌定故未入集現蟄雲已  
逝愴念舊誼特補錄之以誌兩人文字之契



雲在山房詩選

無錫楊壽枏著

長相思

月華灩灩房櫳靜  
碧窗低度流雲影  
筆柱拋殘金雁飛  
爐熏消歇玉鳬冷  
錦衾羅幃生夕涼  
翠帶空繡雙鴛鴦  
櫻桃花開送君去  
如今金井梧葉黃  
別時贈妾茱萸鏡  
不忍對之理紅妝  
長相思在他鄉  
欲往從之限河梁

偕鄧士周秦岐臣章定安集明翠樓

畫閣垂楊裏  
紅闌宛轉斜  
燈涼多傍水  
香煖不關花  
山郭家家翠湖樓  
面

面霞

以排色玻璃嵌窗

惟應簾外月伴我到天涯

余將北上

燕姬行

長安道中書所見與範甫兄同作

平頭高髻青玉梁  
繡袍貼地袴褶長  
蓮花琢屐光綴綴  
金環錯落垂明璫  
車中之人十六七  
臉似朝霞膚似雪  
一朵香融閨苑花  
十分豔吐瑤臺月  
珊瑚鞭鈿轂絡紫  
纓鴉鬟窄袖橫簾旌  
下風忽聽鶯燕語  
知是上林第幾聲  
濯龍門接銅龍邸  
邸執戟長楊夫婿貴  
兒家生小住瑤天  
不識姬姜有顚顚

昔時關塞龍虎爭  
今時輦轂鸞鳳鳴  
路人搖手行  
逡巡當軒一譁屬騎噴  
只愁紫陌紅塵膩  
無端飛入晶簾底

游角山寺

山在榆關內

訪古投僧寺  
登高弔戰場

時海氣未靖關前駐軍

海雲含雨黑  
關月帶沙黃  
劍拭虹

光潤

雨後虹起澗底

衣沾蜃氣涼  
遙知閨裏夢  
今夜到遼陽

戊戌秋感事

軒籙堯圖卜世長  
補天功業仗媧皇  
守文但解師黃老  
改制偏思託素王  
重覩舊儀頒桂殿  
微聞密詔出椒房  
至尊宵旰誰調護  
落葉疏鐘繞建章  
貫索光芒近紫垣  
紛紛緹騎滿長安  
顧廚黨盛成名易  
絳灌交疏舉事難  
幾輩得官憑口舌  
何人報主奉心肝  
可憐寂寞承明殿  
畫盡爐灰字未殘  
上書歷抵漢公卿  
著論縱橫意氣輕  
清議竟能持國是  
高才未免近時名  
刊章空自求張儉  
草表爭傳薦禰衡  
始識本初真健者  
書生白面枉談兵  
兵符調遣日紛紜  
宿衛終應仗虎賁  
聞說璽書徵上相  
特頒節鉞護諸軍



角聲夜徹帷宮月旗影晴連輦道雲何用北門嚴鎖鑰漢廷表餌是奇勳  
五雲宮闕自峨峨雨露平添太液波寇鄧高勳門列戟許班新寵里鳴珂  
黨人北部聲華盛貴戚南陽恩澤多却憶中興諸將帥旂常黯澹舊山河  
讀漢書高后紀

嬴劉間兩呂氏雄者祖龍雌者雉驪山泉涸魚燈枯碭澤風雷赤龍起秦  
鹿走楚雕逝野雞來食龍子趙王蒼狗戚姬跪倚瑟楚歌慷慨流涕英雄  
末路乃至此嗚呼莫倚椒房親滅火者禍水君不見輅鈴廐雞生冠倉琅

根燕啄矢

此詩殆有用  
意 關公評

### 山中曉起

寂寂林塘畔人家尙掩關輕煙浮竹外清露滴松間曝鬣觀魚樂梳翎羨  
鶴閒聞香不知處花藥滿春山

### 游仙詞 十首存四

西極剛馳八駿回又傳仙謠幔亭開瑤池別進天魔舞貂帔鸞裙拂地來

吹笙騎鶴上瑤天讀過琅書第幾篇一自漢皇好丹訣偷桃舐藥盡成仙  
碧桃花下奉霞觴笑聽仙官奏入琅從此上清書懶讀袖中宮譜盡霓裳  
一雙仙鶴守瑤扉玉女投壺夜不歸銀燭未銷殘月落曉風寒透五銖衣

四首皆  
有本事

送同年江杏村侍御歸里

江湖容謫宦投老已華簪慷慨存吾道憂危獨此心時艱臣節苦跡遠主  
恩深應笑長安客金門尙陸沈

宿史村破店題壁

破屋蕭蕭古驛亭荒雞啼處酒初醒三更冷月穿簾入照見莓苔半壁青  
題雲在山房示鄧範卿

終年同吏隱此地稱郎潛階竹斜侵戶簷花倒入簾夜談妨燭短午夢得  
香甜省識幽居樂茶瓜竟日淹

乙巳歲隨五大臣出使歐美考察政治賦呈澤公敬步原韻



寶書百國志環瀛絕域輶軒仰重名大海魚龍迎使節中朝麟鳳出宗英  
八方爭覩旌旄影三殿猶留劍履聲慚愧鄒枚陪後乘但將詞賦頌昇平

太平洋看日出

獨倚舵樓數曉星海風吹面酒初醒波光淨似琉璃鏡雲氣濃於水墨屏  
白浪浮天連北極紅霞捧日出東溟高吟長嘯無人識祇有魚龍水底聽  
泊舟香港和尙惠臣星使韻

瀟瀟梅雨滿南天海嶠蒼茫此泊船萬里帆檣迎曉日四山樓閣倚晴煙  
人來島市知魚賤舟行印度洋食無魚者三日矣客到鄉關在雁先翹首觚稜應不遠碧

霄如鏡月初圓

叢讀君使西南游兩草紀述風土多瑣異之作惜稿已燬僅存二詩涵若注

挽太極宮張鍊師

曾訪幽人叩玉扃洞天深處誦丹經松壇飛檄春祈雨桂殿焚章夜禮星  
化鶴定應游赤壁換鵝誰復寫黃庭前宵夢赴瑤池讌一飲瓊漿醉不醒

金虎乘權王業終紛紛海內幾英雄焚書翻恨秦坑淺拔幟俄驚趙壁空  
幕下青蟲名士鯽帳前赤肯美人虹

女子北伐隊

酈生掉舌陳琳檄抵得沙場

### 第一功

千官黻佩正雍容萬里滇邛忽舉烽事業半生憐畫虎人才幾輩誤從龍  
宮中鳳尾先書諾竈下羊頭盡受封滾滾漳河東逝水墓門寒日鎖楸松  
世事真同貉一邱王侯無種在人謀成神未必皆青骨作賊何能到白頭  
徒手探丸誇任俠傾身障麓號清流羣公衮衮多籌策何用新亭泣楚囚  
四海蕭然征調繁度支費竭仗牢盆西園鬻爵朝官賤北寺刊章獄吏尊  
博士衣冠皆狗曲黨人聲價亦龍門公卿坐論無長策太學諸生又舉幡  
浮沉人海鬢如絲說着滄桑便縐眉翠瓦飄煙鵲觀金溝流月鳳凰池  
星河五夜旄頭動烽火三邊羽檄馳還憶少年京輦夢春鐙臘鼓太平時

### 暑夜柬姚古鳳

深院不知暑竹梧陰四圍蟬聲經雨斷螢影入煙微對月生幽想看雲識



化機石闌貪久坐清露漸沾衣

香山客館聽雨

一石一雲氣千松千濤聲濤將挾石飛雲欲驅松行雲濤與風雨一氣相  
砢訇乍疑龍窟動還恐鼇極傾此時虛館中獨對琴書清冥心百緣寂枯  
坐千劫平須臾衆喧止一碧長天晴四山如膏沐萬籟皆笙簧變態倏起  
滅太虛本無情以茲悟物理息機觀衆生

王陽明青琅玕硯歌爲蟄園主人賦

硯形橢圓色純碧上刻仙佛龍虎諸像款題正德庚辰郭詡爲陽明先  
生製嘯麓得之徵詩社同人題詠爲賦長篇

玉蜍呵霧凝玄液翠墨斑斑土花碧陽明遺澤重千秋浩氣英光留片石  
八分題款硯背鐫製自正德庚辰年武皇鸞輅方巡幸大將龍旗正凱旋  
龍旗犀甲臨江渚生縛寧藩馳露布此硯隨公共策勳墨花飛噴蛟龍舞  
九華山寺宴居時山色青蒼照硯池染翰自鈔傳習錄書丹還刻紀功碑

兩粵提軍建旗鼓此硯亦應從幕府翠色濃霑藤峽煙墨痕潤帶梧江雨  
清狂道人手琢磨雕繪迦葉阿難陀寶鏡照形龍虎伏仗公正氣驅羣魔  
蟄園好古盛文藻傳家什襲誇鴻寶蒸出金壺五色雲石渠祕笈研朱校  
嗚呼鐵券凋磨佩劍亡一雙鸚眼閱滄桑讀書臺下空憑弔秋草斜陽瓦  
礫荒

同人消寒會分詠昆蟲戲作蟲雅一章

保蟲三百族蕃育滿宇宙蠕動與蜎飛厥狀難窮究蟻穴辨君臣蜂房分  
長幼蝙蝠通仙訣蝦蟆解佛咒齋壇玉蝶翔冊府銀蟬走所出雖纖微得  
氣均靈秀奈何瑣瑣輩變態備諸醜營營蠅附羶蠢蠢蠅逐臭刺天蠓蠓  
狂撼樹虬蟬陋蚯蚓爭螭餘螳螂伺蟬後寧憐蠓蠓勞遑計蟪蛄壽聚食  
同蝗蝻孳生類蝌蚪具湯蟲相弔投燄蛾難救蚊雷聲縱喧螢火光詎久  
號寒方瑟縮附熱又奔湊腐木作白窠殘花供飮餽強弱互吞噬雌雄自  
配偶喜則叩其頭怒則鳴以脰此輩何么麼咄哉盡秕垢雞蟲得失間蠻



觸紛相鬪蜘蛛恃網羅蟋蟀矜甲冑山憑白蟬屯塞據青蛉守壘比蝸牛  
屯蝸同蠅虎負金蠶忽反噬養毒適自寇跋扈曾幾時蟲沙骨已朽鰕生  
抱殘編自詡雕蟲手筆禿蒲盧枯琴古鞠通瘦五蠹方著書二豪偕頌酒  
睢盱擲寸管物態窮刻鏤微蟲鳴不平上帝懲厥咎貶入磨蝎宮蟲魚註  
白首

中秋夜偕峻丞栗齋芷升晴初立之侗伯闇公仲遠文樵游瑩園賞  
月

微雨洗清秋銀雲忽破碎夜來氛翳淨月出青松外徘徊上碧霄冰奩吐  
奇采難得素心人適與清景會名園展幽賞花下開軒待寒露滴疏桐風  
篁生夕籟行行轉蘿徑步步入蒼靄一亭枕溪坳溪光蓄深黛柳煙低濛  
濛蘋香微晡藹金波涵綠水蕩作琉璃界到此境更清忘言淡相對蕭寥  
萬古心入我懷抱內清輝幾圓缺冉冉閱人代此夜不常好此樂不易再  
安得生羽翰乘風凌碧海瓊樓天不夜勿使浮雲晦

贈沈南野郎題所著便佳蓀雜鈔

一角荒亭掩薜蘿  
閉門竹素自編摩  
琴無知己寧焦尾  
棋但旁觀亦爛柯  
著述三朝青史在  
交遊四海白頭多  
舊聞家世君能記  
疎柳寒雲憶潞河

先德太守公與先伯京卿公同譜又同官潞河

題襟館雙硯歌

戊辰正月二日冰社同人集於寒碧蓀攜所藏金石書畫互相評玩  
郭筱麓出示文信國蟬腹硯爲題襟館舊藏適章式之攜黃忠端斷  
碑硯亦賓谷所收弄邊題如出一手亦佳話也屬爲賦之

華燈照座光玲瓏  
錦幙玉笈排重重  
就中雙硯最殊絕  
寶氣奕奕輝星虹  
文山石齋丁未造  
各抱大節完精忠  
鐵石肝腸化爲硯  
墨華噴雨雙蛟龍  
英光萬古不磨滅  
遺澤呵護煩神工  
憶昔乾嘉全盛日  
西溪觴咏何雍容  
手摹金薤鐫翠墨  
好古誰似曾南豐  
幕府風流擅文藻  
硯池雙照蓮華紅  
百年以來復易主  
寥寥天海傷孤蹤  
頻伽才調儷彭樂  
實齋博雅儕孫洪



詩歌曾和鐵崖叟

文山玉帶生硯  
曾藏楊鐵崖處

墨妙能摹玉局翁

斷碑硯為  
墨妙亭石

攜來客座

爭撫玩几案並列青芙蓉  
滌以五明之露淨薰以百和之香  
濃石兄對視三歎息互訴身世悲  
遭逢西臺歌罷竹石碎銅山書室煙  
霞封題襟文讌亦寂寞高館客散尊  
罍空飄流桑海重相見清淚浪浪鵲  
眼中

### 白翎雀歌

白翎雀產自東海東一飛入秦塞再飛入漢宮

解一

漢家宮闕千花中碧疏

綺閣十二重銀燭樹前春似海玉條繫雀居雕籠

解二

飼以瓊田禾餌以瑤

林果百鳥爭來朝鳳凰不如我

解三

朝聞雪衣語夜夢疑不祥何如返舊巢

仍逐鳬鵑翔

解四

網羅遮前矰繳伺側金彈橫飛鐵距折羽毛摧落委黃沙

啼血魂歸關塞黑為君慷慨竟此歌鳳撥鴟弦彈欲裂

解五

此當是詠奉帥被炸事其

人其事本不足道詩則  
音節入古樊山文評

### 送顧沅若南歸

白首還鄉壯志孤離亭分手卽歧途勞勞誰是憐君者鬱鬱焉能居此乎

試問桃花不知漢偶思莼菜便歸吳何時共逐鷗夷去一棹煙波泛五湖  
偕粟齋子有乘汽車至大覺寺看花歸途電機忽壞直下山坡馳里  
許輪摧車覆始脫險

車麟麟行古道搖鞭背花去却被山靈惱驅煙喝月阻我行山石犖确車  
礪礪豐隆叱馭祝融怒輪鐵一爆山猿驚驟如馬脫銜又若鳥折翼直走  
危坡下峻坂鐵牡銅關收不得鼻端出火耳生風徒御無聲面如墨懸崖  
勒馬事大奇似有神物相扶持雙輪摧塌截然止精魂猶逐飊電馳自笑  
平生走萬里虎穴鯨波游戲耳那知末路履危機不作三公幾折臂還尋  
舊路上翠微重拂蕙帳牽蘿衣花神一笑山靈喜陌上明朝緩緩歸

自秘魔崖至戒壇看紅葉宿於僧寺忉盦詩成索和賦呈二律並東  
遜園乞畫

行行驢背一詩囊亂踴煙霞渡石梁雲過千峰開紫翠霜催萬樹轉丹黃  
自憐遲暮同秋色翻愛繁華近夕陽終日卷簾對屏障古松影落佛龕涼



寺多  
古松

梅前菊後當看花坐對寒林每日斜秋士風懷偏綺麗冬郎才調最清華

十分冷豔宜詩境一種蕭疏付畫家試仿大癡圖絹素黃子久有秋山紅樹圖煩君

重賦赤城霞遜園爲談天台雁蕩之勝

### 輓丁闇公三首

寒雲蔽亭皋飛雪滿林鴈淒淒古重陽凜凜如歲暮故人臥空堂一病遽

沈痼對我黯無言百感填胸臆君病非不治乃爲藥所誤撐腸萬卷書恨

未擎靈素伏枕淹二旬長眠竟不寤蓉城花冥冥舊是君家主君今脫塵

屣一笑凌雲去存者獨何堪憑棺淚如雨

君才胡石笥君文章博麗僅中副貢薦入禮館身世與稚威略同君貌陳迦陵君銀髯盈尺相者謂似其年余戲語君若

開鴻博科舉當超羣絕倫矣雖應禮館辟未遇鴻博徵晚經桑海變忠憤常填膺白衣

唐羅隱阜帽漢管甯蕭然蜨影樓插架排籤膳茶煙禪榻畔兀兀如枯僧

君喪偶後獨處者十四年我來恣談諧氣若蘭雪澄春風花嶼酒夜月松窗燈共尋讀

雲在山房駢文詩話選  
書樂期作耐久朋如何舍我去寂寞歸荒塋

素琴猶在牀丹函猶在几諷詠豹牌詞摩挲鴈硯字君近得正德豹牌微詞社題詠又得端硯

爲黃莘田十硯之一圖書與金石寶守有才子遺文付校刊此責在後死

悱惻天琴詩纏綿滄趣誌當代兩龍門齊下憐才淚令子奉素輻行行歸

故里藏魄青山阿游神竹林寺君葬於京口招隱山竹林寺之側平生鷄酒約腹痛何能

已惟應冰絲龕地下尋知己栗齋繼逝

和社友白牡丹詩限鹽字韻

不須彩筆乞江淹多買燕支轉自嫌富貴濃時偏淡泊文章豔處卻清嚴

香殘但借鸞翎掃粉重還防蜨翅黏省識花王真本色珠爲步障玉爲簾

和社友綠牡丹詩限鹽字韻

佛頭染就色香兼牡丹綠瓣者名佛頭青一朵亭亭映翠簾落瓣細裁蟬鬢薄折枝

倒挂鳳翎纖籠紗影借春煙護唾袖痕從曉露添何必黃袍纔富貴碧霞

仙境自莊嚴



秋草

悔從南浦種愁根，荒徑蕭蕭自掩門。  
青鬢凋殘名士感，紅心悽黯美人魂。  
寒蟬弔月聲都咽，瘦蝶棲香夢不溫。  
依舊畫橋西畔路，冷煙疏雨寫秋痕。  
搖落邊城一夜霜，寒蕪漠漠塞雲黃。  
胭脂奪去山無色，苜蓿移來土尙香。  
獵騎撤圍驕雉兔，穹廬籠野散牛羊。  
玉關一路傷心碧，誰向龍沙弔戰場。  
王孫何事滯天涯，欲問歸期期總差。  
拔去施心終不死，化為萍梗已無家。  
北征流涕金城柳，南部銷魂玉樹花。  
回首漢宮秋色冷，淒涼青塚弔琵琶。  
霜風吹到寸心枯，一碧如煙淡欲無。  
逋客北山羞薜荔，騷人南國怨蘼蕪。  
荒陵冷落蝦蟆鼓，舊院飄零蛺蝶圖。  
昔日繁華都閱盡，青袍顏色也模糊。

才人感遇詞客哀時以蘭茝之思寫滄桑之感聲  
情沉鬱氣韻高華和作如林皆出其下 吟谷評

靜坐口占示吟谷

吟谷勸余學佛作此答之

不誦華嚴不坐禪，獨於靜處悟真詮。  
歌詩韻出無聲裏，玩易神游未晝前。  
六合本爲情世界，一身都是道淵泉。  
年來心地常清淨，白日時懸夢裏天。

謝茂秦曰常陰夢裏天龔定庵曰夢之境多夜余六十歲  
前夢境非陰即夜六十後心地漸清時現白日青天之象

### 東海行

昔游東海鞭赤龍曉霞倒射扶桑紅雲濤萬里去不息豁然一氣連鴻濛  
中有靈禽銜木石口瘡尾禿心力窮一朝忽變化毛羽似鳳聲嚙嚙朝來  
餐腐鼠暮啄蟻與蟲自矜一出爲世瑞聚族爭食乃與雞鶩同肯將微質  
填碧解詎有大力迴蒼穹况聞碣石東上與銀河通巨鯨吹波黑風起壺  
嶠漂沒洪流中乃知坤輿從古有缺陷斷鰲立柱媧后難爲功

### 與壽人幼梅嘯麓佩忱誦洛瑩園賞荷歸飲寓齋分得門字

梅天蒸溽林氣昏火雲不散冰泉溫朝朝坐臥青玉簾不許熱客來打門

素心惟有竹溪侶

同游  
六人

共攜笠屐尋名園入門景物盡蒼莽枯藤絡石柳

半髡蓮塘十頃最空闊雲水蕭瑟如江村翠蓋迎風萬葉淨縞衣照水千  
花繁湖天一碧澹無暑白鷗與客俱忘言平橋徙倚日漸暮涼吹策策菰  
蒲喧歸來一雨更清絕便覺秋意生庭軒雖無鬧紅停畫舸且共浮白開



芳樽吾曹狂逸天所放如魚脫罟鳥出樊君不見黃塵袞袞東華道車聲  
日夜如雷奔

癸酉六月十二日同社爲涪翁作生日分得字韻

東坡一生困磨蝎公亦命宮多鬼蜮承天院記竟遭誣何異烏臺肆羅織  
憶當元祐歲癸酉公以秘書兼史職明年章蔡驟登朝實錄編成被彈劾  
九死投荒十二年濯足城樓意悽惻當時姓氏入黨碑異代藝林珍翰墨  
至今萬派宗西江終古一星近南極

山谷詩南極一星在江湖

壽公兼欲祭公詩如嚙

梅漿嚼蓮蕙壽公兼復拜公象秋月冰壺照顏色萬荷花擁一吟壇祇合  
水仙來配食碧筩酒冽雪藕鮮清談座上忘炎赫借公生日聚吟朋一醉  
壚頭計亦得

題傅沅叔華山遊記

雲嶂千尺接鉤梯俯視中條樹影低閣棧風高秋落雁祠壇星近夜聞雞  
路從柏箭林邊轉

秦王以松柏箭與天神博遺跡在玉女峰供稚存記所謂翠柏滿厓者也

名在蓮華葉上題

蓮華峰上舊有千葉蓮華服之羽化手挹神漿窺帝座下方烟霧正淒迷

讀子威湘中九日寄懷詩賦此奉酬

早春梅破萼送君游上京遙遙望關塞千里煙塵生花月秣陵春名都擅  
佳麗掉頭不肯住又鼓湘江柅湘江水碧蘭芷馨九疑窈窕雲囊青鷗鵠  
啼烟猿叫月楚娥瑤瑟聲泠泠此地江山盛文藻登高覽古傷懷抱遙憶  
寒雲落照中秋光蕭瑟瓊華島去年九日同在瓊島登高人海論交二十年當時接席

皆豪賢張燈奪錦恣歡謔榜花紅照金桃船

藝園秘圃兩詩社每逢新春張燈奪錦詩榜前列者各贈

花一枝

春明寂寂餘殘夢每過黃壚增腹痛酒徒寥落感荆高詞客飄零哀

屈宋人生聚散如雲漚我滯北地君南州別來詩句更清妙雁聲帶到衡

陽秋

原句

讀萬卷書行萬里如君不負平生志講席新頒鹿洞規行滕猶貯

龍沙記

君前年自關外歸今任湖南大學教授

題脩竹吾廬

開軒掃花徑滿院竹陰疏園叟知調鶴溪童學釣魚苔衣經雨繡柳髮借



風梳長日無他事修琴更曝書

題浣芬二妹憶蓉室唱和圖

渺渺蓉湖波歷歷蓉城樹

江陰城形似芙蓉故又名蓉城

雙槳趁春潮是昔歸寧路昔

日綺窗前春風寫韻天玉臺新樂府譜入鴛鴦絃鴛鴦絃彈折後秋老紅芙  
瘦欲寄大雷書墓草青如繡篋衍手重開吟魂隔夜臺采蓉人已去頭白  
我歸來

湖亭夜坐

溪上綠陰暗夕景掩村墟回瞻翠微裏佛火明僧廬岫銜初月澹潭印春  
星疏孤亭倚碧湖烟水涵清虛稍覺夜氣涼花露沾我裾遠聞鳴榔響小  
艇猶叉魚

曉起看湖上諸山

雲散湖天涼波紋淨如縠春山試曉妝倚鏡照蛾綠掃花人未起林外鳥  
相逐已見漁舟行空濛烟水曲

題仲金滄近居

林塘帶秋色雲水更清虛疊石都成嶂穿泉便作渠雨添荷氣潤風動柳陰疏常擬從君往買陂學種魚

立秋日熙民蟄雲邀瑩園賞荷泛舟遇雨

銀塘瑟瑟秋涼意滿汀洲松翠沾吟笠荷香入釣舟烟中一葉遠雨後萬花幽誰識風塵外蕭然幾鷺鷥

讀道德經書後

老氏其猶龍見首不見尾著書五千言但留鱗爪耳蒼姬錄已衰華顛守柱史紫氣潛神淵靜究天人理木德鍾素王玉書輝闕里想當踞觚時一見卽驚異震旦有聖人

大權菩薩經老子是迦葉菩薩化游震旦

吾道將隱矣東魯麟甫來東

周龍遽逝化身是迦葉玄牝常不死始悟圓覺宗閤合冲虛旨青牛傳道行白馬取經至一花發兩葉都自西方始世敝道術歧學說矜俶詭安得真人興玄風掃塵滓三教統一宗十方遵一軌金輪大世界卽在靈臺裏



世界大同必自宗教  
統一始 陶谷評

### 送友人出關

西風吹葉下亭皋爲爾樽前脫寶刀  
江海飄蕭雙綠髮關山牢落一青袍  
向人莫便傾肝膽處世終須愛羽毛  
虛負黃金臺上意憐君歧路尙勞勞

### 短歌

十二萬年彈指耳後人方生昔人死  
生者浩浩紅塵中死者冥冥黃壤裏  
女媧搏土散爲人運埴製胚忙不已  
又况軒皇造甲兵倉聖制文字鑿開  
混沌竅抉破鴻濛祕紛紛智力相攻  
取憂患都從墮地始兔走烏飛頃刻  
間龍爭虎鬪尋常事到頭但見冢纍  
纍白楊蕭瑟悲風起我願叩鴻鈞從  
此停爐鞴令人不死復不生萬古乾  
坤任遊戲無壽亦無夭無愚亦無智  
百歲恆如少壯人四時多是陽和氣  
不知水火與刀兵熙熙常在華胥世

### 題傅沅叔雙鑑樓圖

我昔夢入卿環中丹樓縹緲十二重  
云是神仙之冊府琅函瑤笈光熊熊

披圖令我憶前夢靈境乃與藏園同藏園居士抱仙骨名高四海稱儒宗  
鞭龍驂鳳游五嶽遍探玉檢金泥封歸來高臥樓百尺四部七略羅心胸  
丹黃手校十萬卷牙籤鈿軸排玲瓏搜輯叢殘訂譌誤精博遠過黃蕘翁  
傳家雙鑑尤珍祕銀鈎瘦勁翠墨濃題識爭誇百衲本宋通鑑世稱百衲本裝潢詎  
惜千金工元通鑑得於金陵市莫子偁先未措意裝潢成乃驚爲瑰寶櫝以文檀函以錦鈐以印記芝  
泥紅恍疑豐城龍劍合寶氣夜夜輝星虹嗚呼百宋千元俱散佚海源高  
閣楹書空此樓獨有神物護刦火不到蓋珠宮我家草堂在湖上梅花繞  
屋香濛濛蠹魚枯死不歸去但有猿鶴吟秋風

枕上不寐偶成

睡方難覓五龍甘筋力衰頽百不堪獨夜心情同警雁殘春意緒似眠蠶  
巖城曉角邊聲起孤館寒衾病骨諳偏是疎鐘斜月裏更無歸夢到江南

呈陳散原文

銅狄摩挲一惘然哀時避地復游燕青山也墮刀兵劫

文棲隱廬山去年避地來燕

白



首重聯翰墨緣詩派西江多變雅黨碑北寺幾名賢枯棋看到盤盤錯冷

眼旁觀四十年

戊戌政變至今將四十年

### 雷萬青琵琶

豬婆化龍殿上坐殿下降臣齊拜賀伶官一怒氣如雷金聲擲地霓裳破

鵝絃裂鳳軫拋銅頭鐵額皆藏逃

諒山有銅頭鐵額陰兵隨之見李林甫皆逃匿見唐說部

此身未佩

金魚袋此手不奏鬱輪袍凝碧池頭血凝碧桃花染徧沙檀槽嗚呼漸離

筑禰衡鼓配以琵琶亦千古

### 題沅叔翠壁題名圖

畫君玉堂石室中瑤函萬軸光熊羆畫君翠嶂丹巖畔手把芙蓉倚天半

藏園癖山如癖書胸貯五嶽真形圖訪碑實宇恣探討白鹿前導青猿扶

摩厓到處留題記定有山靈護奇字筆落中含風雨聲書成上燭星虹氣

回首蓬山感夢華丹青點染幾名家

君與詞林同館畫有蓬山話舊圖

舊題碧落碑猶在

身是仙官蔡少霞

一山左丞以天台赤藤杖相贈賦此報謝

赤城仙翁古鬚眉手持絳節驂文螭曾渡石梁觀瀑布磨底拾得珊瑚枝  
此枝非木亦非竹乃是萬年嶺下百尺朱藤垂瘦如猿引臂縹若蛇蛻皮  
斲爲九節杖拭以赤石脂潤含萬古烟霞氣冷抱三冬霜雪姿

吾別號抱冬居士

懸之素壁吐光怪比似蝦鬚鱗角尤瓌奇年來自歎腰脚軟仗此穩步危  
能持我聞天台四萬八千丈瓊臺金闕羣仙嬉徑思拄杖登絕頂從君采  
藥餐華芝只愁山齋留不住化作赤龍鱗甲蚘蟻騰空飛

寒雁

天寒歲暮憂亂思鄉借題寓感不自覺聲之哀也

月黑天高夜雨霜憐君辛苦尙南翔啄殘菰米湖田冷銜罷蘆花澤國荒  
嚙雪繫書來瀚海

指遼左諸故人

驚風結陣度衡陽

避兵者多至湖湘

凍雲影裏邊烽急

衝斷寒空字幾行

倦羽飄蕭客異鄉雪泥零落水雲荒天涯到處愁增繳歲晚何心戀稻梁  
警月聲高多急柱衝風字勁半斜行寒枝揀盡棲難穩總爲驚絃易斷腸



齋中蠟梅盛開香韻雙絕賦此賞之

誰點冰酥幻作花獨從歲晚占清華檀心吐豔攢瓊瓣梔貌含芬綻錦葩

柳文向之黃者梔也澤者蠟也今之梔其貌蠟其言亦良多矣

綴玉蟲銜釵朶小嗽金鳥蹴鈿枝斜葢宮

試檢羣芳譜仙尉門楣是一家

半含磬口暈檀霞獨抱冬心是此花姑射冰魂招綠萼羅浮雪骨換黃芽

黃芽是仙人換骨之藥張泌詩應將仙骨換黃芽

蛭膏夜凍凝珠芍蜂蜜春融蘸玉葩猶記鳳池

初退直九英映日出東華

常朝錄元積爲承旨朝退立九英梅下初日映之內閣在東華門內

從坊肆塵架中得前朝爵秩全函數十冊排比叢殘戲繫以詩

卿相偕丞尉塵中一例埋爲蟬添俸料如鯽列官階末路功名賤清時仕

宦佳蘭臺曾注籍舊物付推排

題劉翰怡京卿

崇陵補樹圖

先德澄如閣學曾充監脩官

槿枯蕭蕭北風怒蒼鼠跳踉赤狐舞魚燈黯澹照靈旗楓林月黑山精語  
衣冠已改原廟遷寂寞珠邱一坏土茸帽麻鞋下馬來有人拜掃紅墻路

憶昔海寓昇平餘先臣侍直承明廬玉棺下降金輿出考卜曾獻橋山圖  
一朝宮闕生烟霧手裂朝冠文誓墓舊業惟存南郭田歸魂猶戀西陵樹  
敢塗草草閉玄堂石馬無聲對夕陽翠柏彫疏馳道壞青槐寥落寢園荒  
名家忠孝承先志親謁神宮翦荆杞補種長松十萬株寶城鬱鬱添佳氣  
嗚呼麥飯冬青故國春銀鳬金雁總成塵櫻桃不薦園官果楊柳惟充垓  
卒薪零落龍髯傷墮劍蕭條獼尾痛攀輪披圖忍話先朝事我亦荒山荷

鍾人

余亦曾  
充監脩

### 除夜述哀

玄雲蔽廣野孤雁影徘徊冉冉流年逝慘慘白日頽四時相代謝冬去春  
復回如何泉下人一別不再來同心五十載棄我歸夜臺羅衣疊空箱寶  
鏡生塵埃虛堂展遺影奠子酒一杯銀燭無輝光爐香漸成灰家家語笑  
喧我獨心肝摧終愧莊生達永軫安仁哀

語澹情濃是明四皇甫體  
今成廣陵散矣 幼梅評

和吳子通戊寅秋感

粵人官燕  
負才不偏



憔悴南冠一秃翁  
閉門咄咄但書空  
戰塵匝地成黃霧  
兵氣經天化赤虹  
覓食饑烏常繞月  
失羣斷雁易驚風  
可憐燕市悲歌客  
都在憂貧憫亂中

時中日兵  
事方起

一局危棋冷眼看  
池魚幕燕暫偷安  
秋風擊劍芙蓉冷  
朝日窺盤苜蓿殘  
桐出爨餘焦尾貴  
柳經髡後折腰難  
才人老去知音少  
獨抱哀箏不忍彈  
滄波日夜向東流  
兵事由北而南  
莽莽烽烟接素秋  
近海樓臺龍氣潤  
極天關塞雁聲愁  
家家燃桂黃金盡  
歲歲簪莢白髮羞  
淒絕一篇枯樹賦  
蘭成臥病憶南州

### 憶南州

百年已分生無幾  
萬事惟除死未曾

放翁句

獨坐獨行神恂恍  
半醒半醉思

夢騰涼秋庭院  
瀟瀟雨殘夜樓臺  
黯黯燈小枕單衾  
人不寐此時幽恨最

難勝

寓悼亡意

平生志業總蹉跎  
晚學冥鴻避網羅  
黃葉打頭秋色老  
青山埋骨酒人多  
徒留面目供描畫  
枉費心肝付琢磨  
獨立西風殘照裏  
共誰揮淚話銅駝

己卯七月河隄潰決津門陸沈僕避地北京知交蕩析音問不通水勢稍退以詩代簡

已是虫沙徧戰場魚龍何意更披猖潮隨雨勢侵書閣浪挾風聲撼畫廊  
比屋盡消烟火影全家多住水雲鄉神州此日無完土我欲騎驎走大荒  
圭幣年來廢送迎靈祇遷怒到蒼生龍爭誤觸天瓢覆鼉動愁隨地軸傾  
河伯擁楂驅浪立海童擊鼓踏波行焦原未熄還沈陸亂世從知物命輕  
樓臺十里沸笙歌此地銷金別一窩商有高貲誇互市吏無上策議防河  
沙橫斷岸蠓房出雨漏荒隄蟻穴多劫運本由人事召錢刀衮衮委洪波  
花竹荒涼蜃氣腥琴囊畫匣盡飄零蠹衣色映空齋綠蠹粉痕粘破壁青  
落水人誰珍襖帖懷沙天尙厄騷經

宋揭雲庵碑元刻  
楚詞均已漏爛

家居撞壞何須問

徧野哀鴻不忍聽

洛笙構石蓮山莊於海濱已十年矣近因道葺不能往屬墊雲寫圖  
以當臥遊圖成而洛笙遽逝展讀淒然題於卷後



一角園林枕翠微十年種樹已成圍  
花開果熟留猿守松老苔荒化鶴歸  
晝靜白雲棲斷壑秋高黃葉掩空扉  
披圖猶識蓮峰影瘦碧亭亭對夕暉  
遼友勸余出關作此答之

壯志蹉跎已白頭肯從萬里覓封侯  
人占氣象雲龍虎

用史記范增語

我視功名

風馬牛金本不祥休自躍玉雖有價  
敢輕投走胡走越成何用南北紛紛  
貉一邱

### 新春書感和友人韻

依然氣象似承平貼燕粘雞歲序更  
玉笛一吹梅盡放銀燈四照雪初晴  
難忘學舍齏鹽味

用二宋事

還聽江城爆竹聲我亦鳳池曾僦直  
千官珂佩記

朝正

結用原詩意

依舊風從巽地來

前朝元旦太史奏風從巽地起

冰霜歷盡盼春回八方不斷皆兵氣萬

古難消是劫灰憂樂常懷經國志安危須仗救時才  
狂瀾今日憑誰挽話

到蘆溝事可哀

結亦原詩意

亂離身世客天涯  
哀逝文成恨更加  
無復閒情訪桃葉  
但餘孤影伴梅花  
清齋梵夾耽禪味  
畫省香爐憶夢華  
自笑閉門忘甲子  
不愁歲厄到金蛇

世傳黃藥禪師歌不  
甚驗金蛇謂辛巳

我是雲房退院僧  
羨君意氣劇飛騰  
此才能令國輕重  
吾道不隨時廢興  
變態風雲仍玉壘  
消魂花月是金陵  
新詩寫遍鵝溪絹  
抵得唐衢淚數升

### 防空

劫運開時武器精  
赤龍吐舌欲燒城  
雲高仰候盤雕影  
風緊先傳唳鶴聲  
百萬玉鱗天上戰  
一雙金翅日邊行  
雷車擊後陰薶散  
蛟鱷潛逃魑魅驚  
癸未秋大病一月  
病中所歷情境宛然  
廿年前鄉居湖上暮歸時也  
夢中所得詩句約略可記  
愈後足成十四韵留爲紀念

病中何所憶憶我湖上居  
鄉居好風日出郭訪樵漁  
鐘鳴山寺暮墟里人煙稀  
羣動皆休息吾亦返吾廬  
沿溪漾輕舟一路蘋風微  
明月出東嶺烟樹斂夕霏  
舍舟步蘿徑策杖叩松扉  
山妻具麥飯燈下候我歸  
鱸斫銀鱗



鮮肪切玉筍肥綠菰與赤莧一一羅園蔬飽後何所營時復讀我書空庭

花木影澹澹涵清輝以上夢境此境成夢幻此心早息機倘乘元化去心境俱

清虛山妻逝已六年余將望八不知何日乘化歸休也

余以光緒甲申入泮至今歲適一甲子科舉雖停而重游泮水仍多

舉行今則兵戈滿地蠻舍荆榛無地可游欲歸不得前代稱為佳話

者今反增感慨矣仲虎同年以詩索和爰賦六絕追述舊游

欄衫乍著正華年泮壁春波照影妍最羨青雲初發軔承平人物盡如仙

學派當年溯永嘉賞音何幸遇夔牙學使者為瑞安黃漱蘭先生蕭蕭破篋留詩卷曾

對秋江賦落霞癸未院試詩題為餘霞散成綺余有句云白地光明錦青天頃刻花為學使賞拔提擢以疵見擯

盧後王前愧知名余縣府試累第二院試始列第一人說文章有定評誰道黃童年最少

同學三十九人余最幼談經席上冠羣英院試卷批經義紛披後二高議宏論得未曾有拔之為讀經者勸

青衿講舍橫經日黃卷名場校藝時樂事如今難再得秀才風味幾人知

孝秀傳家世澤醅一門衿珮盡恂恂游庠兩度稱佳話九老圖中見五人

雲在山房賦文詩譜  
十年前吾宗繪有壺中九老圖圖中重游泮水者彼荔叔石漁  
仁山蔭北兄并余五人皆登甲乙科荔叔石兄已重逢鄉舉

俎豆荒涼鬢舍蕪白頭作客臥江湖摩挲老眼題詩卷留得松厓雅集圖

丙寅歸里與同學十三人懽聚繪有松厓雅集圖今已十八年存者止二人矣

### 題虛白蜀江歸夢圖

烽火關山賦遠游青楓江上一扁舟清猿冷雁霜天角催得征人白了頭

年來脩持淨業日誦梵經心中湛然頗悟涵養二字之妙賦示圓覺

### 居士

八十年華如逝水三千世界本微塵衆生顛倒夢中夢諸相莊嚴身外身  
玄牝深藏精自固丹嬰靜養氣常勻花涵曉露珠涵月一味胸中盎盎春  
丁亥秋夕枕上作

少年意氣劇清狂自信前程不可量雲夢平吞無芥蒂泰山俯視等毫芒  
乘槎萬里煙濤上珥筆三霄日月旁衰髻蕭蕭今八十孤燈寒雨臥空牀  
余弱歲夢至一海島天水一碧桃花滿山朝日射岩石作紫金色一



道人立岩上問此何地曰華山也題詩於石而醒僅記後二句今春  
又夢至其處則夕照銜山桃花已謝又見前道人顧余曰曷歸乎來  
尋石上詩不得醒而足成之

七十六年彈指過道人猶道我歸遲紅霞不動海天曉正是碧桃初放時

第二次夢在癸未春疑爲游岱之兆是秋大病幾  
死幸而更生竟未應夢今又三年矣丙戌十月記





雲在山房詞選

無錫楊壽枏著

百字令

十剝海觀荷萬紅過雨一綠流雲徙倚湖亭因成此調邀剛父同作

銀塘雨過對明漪瑟瑟漸生秋意羨煞紅蜻蜓一點來往藕絲風裏綃薄  
裁霞盤低瀉露舞罷鮫珠碎液池深鎖銅溝流盡鉛水長憶消夏灣頭  
滿湖花氣薰得煙波醉雙槳鬧紅搖夢去一片暖香冷翠鏡檻衫痕筆船  
珮影舊約青鴛記汀洲日暮碧雲冉冉千里

又自題五十  
歲小像

平生不慣學青油幕下謝宣明面蟬腹龜腸成底用空受庸奴白眼腐鼠  
功名枯蟬文字誤被虛聲賺蹉跎末路鏡中華髮偷換當日錦帶黃鸝  
承平年少看得春光賤莽莽乾坤龍漢刼身逐風輪旋轉桐樹心孤梅花  
骨冷世味都嘗遍蓬萊海水更經幾度清淺

金縷曲

樊山丈由燕京來津偕桐淵聞公寒雲飲於酒廬卽席賦呈樊丈  
並邀諸子同作

柳外東風峭近清明梨花釀熟采芝翁到重認旗亭青帘影

東興樓爲北  
京酒館今移

津帘角京塵未掃看海上紅桑已老法曲飄零宮羽換聽玉琴彈出清商

調渾不似舊懷抱 交游寥落空文藻贖當年蘿溪畫卷茗樓詞稿璧月

銅街行樂地換了冷煙殘照更愁絕江花江草無限蘭成蕭瑟感莽風塵

頭白知音少歸夢遠楚山曉

滿庭芳

春半獨游瑩園蘿幌陰濃杏衫寒峭景物蒼莽可憐追憶春明舊  
游彌不勝元都葵麥之感適鶴亭沅叔書來訂日下看花之約倚

聲代柬

芳樹籠煙輕陰閣雨峭寒勒住春光玉闌干外風颭柳絲黃一片林塘幽



靚惜惜地鶴守丹房無人處簾陰瘦碧松影度迴廊  
蒼涼燕市筑旗亭  
酒盡輦路苔荒祇免葵燕麥綠遍斜陽難得薇壺舊侶還料理簫局箏囊  
瑤壇畔細桃似繡猶帶茗花香

用去春詠桃  
花茶故事

瑣窗寒

疊雲新愈小集相應適逢快雨喜填此解

潤逼香篝涼分畫簷藥爐煙靜林亭乍掃滿院苔痕蕉影望前溪夕陽驟  
沈一簾梅雨黃昏近愛風荷水面紅搖碧颭萬珠圓迸問訊東陽沈甚  
殢酒耽吟帶圍瘦損清宵翦燭重譜蠶洲笛韻料單衣猶怯晚涼玉琴絃  
澀冰簟冷步空庭溼翠濛濛澹月穿花徑

浪淘沙

小雨過荷亭執扇涼生一簾花霧夜冥冥新月澹黃雲淺碧幾點疏星  
悄悄酒微醒勸倚桃笙藕絲衫薄髻蟬輕十二紅窗多掩上怕聽秋聲

邁陂塘

秋水

渺鷗天蔚藍千頃林巒倒映清峭綠波南浦銷魂後又是五湖秋早重倚

懼愛藻影蘂香翻比花時好蓮衣褪了牘幾點青荷漁娘眉翠還向鏡中  
掃橫塘路前度瀾裙曾到如今楓荻都老江天一色涵空碧襯着落霞  
殘照歸夢杳問蟹舍魚村何日容垂釣愁心縹緲更遙指紅牆盈盈一水  
銀漢挂清曉

永遇樂

詞社五十集查灣席上賦呈同社

南月愁烏西風驚雁哀角如雨蠟淚爐香畫堂清夜人似春星聚詞場跌  
宕鴛箋麝墨爭寫四紅宮譜一聲聲冰絃彈徧最憐錦瑟音苦蘭成老  
矣平生搖落賸得江關詩賦千古淒涼唐愁漢恨借玉箏低訴那堪重憶  
黃驄陌上一片殘簫倦鼓尋燕市荆高酒伴狗屠在否

踏莎行

寒菜

翠玉根香黃金蕊嫩芳郊綠上春衫影如今煙水板橋西荒畦十畝斜陽  
冷苜蓿朝廚蓬蒿晚徑猪肝風味輸君俊黃蘗百甕足生涯閉門自署

園官印



短笠生涯長鑱身世英雄末路都如此荒村斜日故侯家空園秋雨前朝

寺綠潤霜天紅肥雪地年年諳盡酸鹹味先生一笑在冰壺不愁黃葉

西風起

黃葉西風起乾  
蕩淮張時童謠也

應天長慢

清真體

費宮人巷在天津學宮前明末費宮人之故居也宮人天津人以  
夏家子選入宮甲申四月闖賊陷京師魏宮人等二百餘人皆投  
玉河費宮人亦投井賊出之乃詭稱長公主見闖闖令宮監驗之  
非是以賜賊將一隻虎是夕醉虎以酒刺殺之亦自刎年甫十六  
也同人僑寓津沽感慕芳烈約拈此調以紀之

玉河瘞碧金井盥脂滄桑屢換塵刼舊日綠楊門巷紅鵲尙啼血宮鴉小  
能殺賊勝石砭錦袍忠烈想羅袖噴灑桃花劍影如雪回首弔乾西一

炬青霞蘭麝散芬鬱

思陵選宮人入青霞室祇應  
賊至奔入乾西園戶自焚

更有美人虹起英英貫

星月津橋畔尋翠碣莫認作苧蘿香屨料應伴帝女乘鸞同返瑤闕

探芳信

集林子有飛翠軒看杏花時子有將赴申江

過春仲乍梅雪消寒梨雲破凍又鬧紅庭院香煖日華動白頭已沒簪花  
分醒了瓊壺夢更休談碎錦春風鈿蟬箏鳳帶雨客颿重想此去江南  
玉笙愁弄十里紅樓簾捲萬花擁縱饒院體描金粉爭似瑤臺種訪詞人  
可有蓬山小宋

樊山文曰綺密似夢窗而化其晦澀誠佳構也

清平樂

上元燈詞

香塵如霧月轉華燈午額繡宮梅聞笑語猶鬪翠蛾妝譜

乾淳歲時記元夕內人及小黃

門皆巾裏翠蛾

曾游絳闕瑤壇海霞紅照鰲山銀燭樹前似畫不知簾外春寒

雪晴池館珠樹銀燈煖誰識霓裳宮譜換依舊六街絃管當年躡月東  
華貂裘夜醉琵琶今夕燒殘鳳燭玉蟾冷照梅花

渡江雲

詠桂

誰將金粟影裝成七寶一樹畫闌前萬花攢瑣碎散雪團雲綴就蕊珠圓  
飴醞五夜向定中參到犀禪空悵望廣寒深處宮殿鎖涼煙堪憐蟾寒



影瘦蟲老香殘問婆婆誰翦料上界銀河淺後也種桑田吳剛玉斧渾拋  
卻是幾時謫下瑤天歸正好小山秋色清妍

樊山丈曰金  
梁夢月之亞

剔銀燈

聞雁

清夜誰調箏柱彈入霜鴻哀譜孤館燈殘空堂酒醒勾起淒涼百緒天涯  
倦羽比聽到嘯鵲更苦歲歲銜蘆覓侶且爲稻粱留住陣斷衝寒聲高  
警月常此流年暗度北來南去試問爾定居何處

雙調憶王孫

秋草

遠近關河殘照裏空滿目冷煙荒翠裙腰黯澹玉鉤蕪漸瘦到紅心死

青袍一例傷憔悴似老去庾郎身世衰螢化碧照秋墳是萬古傷心地

闕下

傷閨公  
之逝也

山亭宴

初冬集李又塵永香榭

一棱霜月窺簾瘦逼茸衫夜寒初透芳序怎匆匆又數到梅前菊後銅荷  
燭淚照深杯有幾輩題箏籠袖呵墨校詞箋漸鳳硯冰絲縐溪山罨畫

空回首料一樣冷雲疎柳塵海幾閒鷗笑我亦漫郎聲叟相逢南雁話鄉  
愁問湖上芙蓉開否故鄉城西有芙蓉湖歲晏孰華予且共泛紅螺酒又塵宜與人藏有萬紅友

硯鳳

金縷曲

送春

遶左故人談關外近事感成此闕

開過荼蘼了怎朝朝風風雨雨雲屏寒峭只有杜鵑啼最苦啼徹紅樓春  
曉恨底事春歸太早又聽鷓鴣聲聲喚道黃塵遮斷關山道行不得此間  
好銀箋疊遍傷心稿歎而今珠鈿零落玉顏漸老青子綠陰惆悵日銷  
減髻絲多少祇廢苑還生芳草試問銅溝漂花片共滄波趨海何時到誰  
知我甚懷抱孫師鄭曰稼軒啼鵑之思碧山咏蟬之感

百字令

山村旅宿絡緯聲出自籬根獨客悲秋譜成此調

蕭蕭戚戚一聲聲只在豆花深處金井銀牀涼月下縷出愁絲千縷燈火  
昏黃星河夜碧冷答秋筵語荒村孤館聽來音更酸楚誰伴思婦閨中



流黃織素軋軋鳴鴛杼生怕玉關寒信早催入西風砧杵瘦螭偎煙暗螢

咽露多是悲秋侶寄人籬下候蟲身世最苦偶於友人扇頭見此闌乃少年客井門所作因錄存之時

游晉撫幕故有寄人籬下之語

八聲甘州 題子有填詞圖

記五陵裘馬少年場倚醉看吳鉤歎而今憔悴蕉心綠怨梳尾黃愁回憶

雲津舊侶漁唱海天秋津社所印詞曰海天漁唱客鬢垂垂老夢覺揚州剪取淞波

一角算江湖滿地着箇閒鷗有花間小榭花外小紅樓底須教蓮鴂按拍

君無姬侍度新腔自擘鈿箜篌憑闌聽聲聲鐵笛譜入蘆洲

YORK UNIVERSITY

JUL 03 2001

EAST ASIAN STUDIES

